

平

蜀

記

撰人不詳

中華書局

叢書集成初編

東征紀行錄（及其他二種）

中華書局出版發行

（北京王府井大街三十六號）

秦皇島市資料印刷廠印刷
一九八五年北京新一版

開本：七八七乘一〇九二毫米三十二分之一
統一書號：一七〇一八·一五一

叢書集成初編所選紀錄彙編
借月山房彙鈔澤古齋重鈔皆
收有此書澤古本用借月版而
加釐訂故據以排印

四庫全書提要

平蜀記一卷。不著撰人名氏。載明洪武四年。遣湯和等伐蜀。明昇出降事。後附劉基平西蜀種一篇。末有袁褱跋。稱定遠黃金開國功臣錄。載平蜀事於潁川侯傅友德、德慶侯廖永忠傳中甚詳。惟平章楊璟與明昇書。乃詳於斯記云。

平蜀記

失名

洪武四年春正月丁亥。上親祀上下神祇。告伐明昇。命中山侯湯和爲征西將軍。江夏侯周德興爲左副將軍。德慶侯廖永忠爲右副將軍。率京衛荆湘舟師。由瞿塘趨重慶。潁川侯傅友德爲征虜將軍。濟寧侯顧瑄爲副將軍。率河南陝西等處步騎。由秦隴趨成都。先是崇陽侯楊璟。以上命至蜀。諭以禍福。昇奉於卒議。不能決。璟還。復以書曉之曰。璟聞古之爲國者。同力度德。同德度義。義不足則不敢抗。德不足則歸順焉。故能保身家於兩全。流名譽於無窮。福及子孫。族姓長久。反是者。往往取敗。今足下以幼沖之資。藉先人之業。據有巴蜀。默然在位。不咨至計。而聽羣下之議。以瞿塘劍閣之險。一夫負戈。萬人無如之何。此皆不達時變。以誤足下。何則。昔之據蜀最盛。莫如漢昭烈。諸葛孔明佐之。訓練士卒。財用不足。皆取之南。然猶朝不謀夕。僅能自保。今足下驅場南。不過播州。北不及漢中。以此準彼。相去萬萬。而欲以一隅之地。延頃刻之命。可謂智乎。若謂險阻可恃。則三苗之墟不滅。有扈之國不亡。鯀鼈魚鼉之鄉。不至足下矣。我主上仁聖神武。遣將用兵。天下無敵。運謀出奇。神明響應。順附者無不加恩。負固者然後致討。以足下先人通好之故。不忍加師。數遣使諭意。又以足下年幼。未歷事變。恐惑狂瞽之說。失遠大之利。故復遣璟。面諭禍福。深仁厚德。所以待明氏者。不淺。足下可不深念之乎。且向者亂雄如陳友諒。張士誠。竊據吳楚。造舟塞江河。積糧過山岳。強將勁兵。自謂莫敵。然鄱陽一戰。友諒授首。旋師陳討。張氏面縛。此非人力。實天

命有在也。足下視此，以爲如何。友諒之子竄歸江夏，王師致討，勢窮出降。主上宥其罪愆，封以侯爵，恩榮之盛，天下所知。足下無彼之過，而能幡然覺悟，獨斷於心，自求多福，則必享茅土之封，保先人之祀。世世不絕，豈不賢智矣哉？若必欲倔強一隅，假息頃刻，魚游於沸鼎之中，燕巢於危幕之上，禍害將至，恬不自知。環恐天兵一臨，勢不可禦。前日之臣爲足下謀者，或以郡獻，或以城降，各自爲身計，以取富貴。當此之時，老母弱子，獨不痛心乎？禍福利害，瞭然可觀。逆順之途，在足下審之而已。昇不能聽，至是乃命和等征之。環本儒生出身，故通於文。上諭和等曰：「今天下大定，四海莫安，惟蜀未平。朕以明玉珍嘗遣使修好，存事大之禮，故於明昇憫其稚弱，不忍加兵。遣使開諭，冀其覺悟。昇乃惑於羣言，反以兵犯吾興元，雖敗而師而去，然豺狼之心，終懷嚙噬。今命卿等率水陸之師，分道並進，首尾攻之，使彼疲於奔命，勢必當克。但師行之際，在肅士伍，嚴紀律，以懷降附，無肆殺掠。昔王全斌事，可以爲戒。卿等慎之。」三月，傳友德攻蜀階州。初，友德陛辭，上密語之曰：「蜀人聞吾兵西伐，必悉其精銳，東守瞿塘，北阻金牛，以拒我師。彼必謂地險而兵難至。若出其不意，直擣階文，則門戶既墜，而心腹自潰。兵貴神速，但患卿等不勇耳。」友德受命，至陝集諸道兵，揚言出金牛，而潛使人覘知階文守備果弱。於是引兵直趨陳倉，選精兵五千爲前鋒，攀緣山谷，晝夜兼行。大軍繼之，直抵階州。蜀平章丁世珍率衆來拒。友德擊敗其衆，生擒其雙刀王等十八人。世珍遁走，遂克階州。進至文州，距城三十里。蜀人斷白龍江橋以阻我師。友德督兵修橋以渡。至五里關，世珍復集兵據險。友德奮兵急攻破之。世珍僅以數騎遁。文州亦克。五月，湯和兵進攻瞿塘關，以江水暴漲，駐

兵大溪口。是月傳友德兵亦至漢江。以水大不得渡。乃令軍士造戰船百餘艘。然蜀人雖失階文。猶恃漢水自固。及聞我師造舟進取。益震恐。友德欲以軍中消息達湯和。而山川懸隔。適江水暴漲。乃以木牌數千。書克階文。月日。投漢江順流而下。蜀中見之。爲之解體。其丞相戴壽。大尉吳友仁等。方悉衆守瞿塘。以阨三陟之險。及聞階文破。乃分兵守瞿塘。還援漢州。以保成都。未至而友德舟師已逼城下。因迎擊壽兵。大敗之。遂拔漢州。以濟寧侯顧時留守。而自將趨成都。上聞湯和駐兵大溪口。欲候水平進師。恐其逗遛。悞事。適友德捷至。乃下詔責其畏怯。恐失機會。廖永忠聞命。卽率所部舟師先進。和猶遲疑未決。及得木牌於江。知友德已克階文。乃自白鹽山伐木開道以進。永忠師至瞿塘關。以山水峻急。且蜀人設鐵索飛橫橋據關口。舟不得進。永忠密遣壯士數百人。昇小舟踰山度關。以出其上流。人持檣。帶水筒。以禦饑渴。蜀山多草木。令將士皆衣青蓑。魚貫出崖石間。蜀人不之覺也。度其已至。乃率精銳軍分爲二道。夜五鼓。以一軍攻其陸寨。一軍攻水寨。將士皆以鐵裹船頭。置火器而前。黎明蜀盡銳來拒。永忠已破其陸寨矣。旣而將士昇舟出江者。一時俱發上流。揚旗鼓噪而下。蜀人出不意。大敗。下流之師亦擁舟前進。發火砲夾擊。大破之。遂焚三橋。斷其橫江鐵索。生擒八十餘人。斬首千餘級。溺死者甚衆。明日湯和兵亦至。永忠乃與之分道並進。和率步騎。永忠率舟師。約會于重慶。七月廖永忠自夔州抵重慶。次銅鑼峽。明昇大懼。或勸奔成都。其母彭氏泣曰。事勢如此。縱往成都。不過延命旦夕。今大軍勢如破竹。人皆膽碎。豈更效力。然終亦不免也。不如乞降。以免生靈於鋒鏑。昇遂遣使請降。永忠以和未至。不受。踰旬和至。會兵城下。

是日昇面縛銜壁詣軍門降。和受壁。永忠解縛。撫慰之。是月傳友德兵圍成都。戴壽等出城拒戰。以象載甲士列於陣前。友德命前鋒以弓矢火箭衝之。象中矢卻走。壽兵躡籍死者甚衆。會湯和遣人報重慶之捷。壽等亦得其家書。知重慶已降。而室家皆完。遂無鬪志。遂籍府庫詣軍門降。九月湯和等遣人送明昇并降表至京。詔省部議受降禮。省部言宋太祖乾德三年蜀主孟昶降。及子弟官屬至闕下。皆素服紗帽進待罪表。俯伏于地。通事舍人掖昶起。鞠躬聽命。宣制釋罪。昶等再拜。三呼萬歲。閣門使承旨。賜昶等襲衣冠帶。昶等再拜跪受。各就次易服。然後入見於崇元殿。閣門使引昶等入。蹈舞稱謝。宣徽使承旨。宣喚昶等再拜。陞殿。至御座前鞠躬。太祖親撫問之。昶還位。與其官屬皆蹈舞再拜。呼萬歲出。中書門下率百僚稱賀。今擬明昇朝見禮。上御奉天殿。明昇於午門外跪進待罪表。侍儀使捧表入。宣表。官讀訖。承制官出制。傳昇等皆俯伏于地。侍儀舍人掖昇起。其官屬皆起跪聽。宣制釋罪。昇等五拜。三呼萬歲。承制官傳制衣服冠帶。侍儀舍人引昇入丹墀中。四拜出。丞相率文武百官行賀禮。上曰。明昇及其官屬朝見。百官稱賀。授昇治國政。所爲皆縱。昇年幼。事由臣下。宜免伏地上。表待罪之禮。是日明昇及其官屬朝見。百官稱賀。授昇傳爲歸義侯。賜冠帶衣服及第宅于京師。時全蜀已下。惟吳友仁尙據保寧。冬十月湯和遣江夏侯周德輿會傅友德等克保寧。執友仁送京師。蜀地悉平。十一月湯和等師還。各上所佩印綬。并所得蜀金印冠冕儀仗及銀印五十八。銅印六百四。總制府七。元師府八。宣慰宣撫司二十五。州三十七。縣六十七。官吏將士五萬九百十人。馬騾一萬三千八百餘疋。

平蜀記不知何人所撰。予觀定遠黃公金、開國功臣錄、載平蜀事于潁川侯傅友德、德慶侯廖永忠傳中甚詳。若平章楊璟與明昇書、乃詳於斯記也。廖公傳後載皇祖御製平西蜀文。末有傳一廖次之語。五言次第。真馭將之明鑒也。嘉靖乙巳清明日汝郡袁襄記。